

## TÓNLEIKAR

## Veisla tónskáldanna hefst í dag

„Við höfum í nokkur ár verið með opnunartónleika Myrkra músikdaga, og það er mjög skemmtilegt,“ segir Rut Ingólfsdóttir fiðluleikari og leiðtogi Kammersveitar Reykjavíkur.

Kammersveitin verður með tónleika í Listasafni Íslands í kvöld og með þessum tónleikum hefjast Myrkir músikdagar, hin árlega tónlistarhátíð Tónskáldafélags Íslands.

Tónverk íslenskra tónskálda eru jafnan í hávegum höfð á þessari hátíð. Á opnunartónleikunum flytur Kammersveitin verk eftir Pál P. Pálsson, Karólínu Eiríksdóttur, Gunnar Andreas Kristinsson, Jón Nordal og Tryggva M. Baldvinsson.

„Núna erum við að flytja verk sem hafa verið samin fyrir okkur sérstaklega, bæði fyrir þó nokkru síðan og eins verk sem eru alveg ný.“

Elsta verkið er Brot eftir Karólínu Eiríksdóttur. Það er samið árið 1979 og frumflutt á Myrkum músikdögum árið 1980.

„Breiddin í aldri tónskáldanna finnst mér líka skemmtileg. Jón er elstur, hann er fæddur árið 1926, en Gunnar Andreas er yngstur, fæddur 1976. Það eru því 50 ár á milli þeirra og ég vona að þeir verði báðir viðstaddir á tónleikunum.“

Tónleikar Kammersveitarinnar hefjast klukkan 20, en þeir verða reyndar ekki fyrsti viðburðurinn á dagskrá Myrkra músikdaga í ár, því

barnaóperan Undir drekavæng verður frumflutt í menningarmiðstöðinni Gerðubergi klukkan 14. Óperan er eftir þær Mist Þorkeldsdóttur og Messíonu Tómasdóttur og fjallar á skemmtilegan hátt um rétt náttúrunnar og þeirra sem minna mega sín.

Aðrir fastir liðir verða á sínum stað á Myrkum músikdögum þetta árið, svo sem stórir tónleikar með Sinfóníuhljómsveit Íslands á fimmtudaginn, og hátíðinni lýkur á tónleikum Caput hópsins 6. febrúar. Einnig verða raftónleikar, blásaratónleikar, kórtónleikar og flaututónleikar, svo nokkuð sé nefnt af fjölskrúðugri dagskrá þessarar árvissu tónlistarveislu. ■



FRÉTTABLAÐIÐ/EÓL

**BERNHARÐUR WILKINSSON, RÚNAR ÓSKARSSON OG GUNNAR ANDREAS KRISTINSSON** Bernharður er stjórnandi Kammersveitar Reykjavíkur á tónleikunum í kvöld, Rúnar er einleikari á bassaklarinet og Gunnar eitt tónskáldanna sem flutt verða verk eftir.

## Ógeðsleg og falleg

„Hún er svolítið ógeðsleg, og líka alveg ógeðslega falleg,“ segir Bjargey Ólafsdóttir um stuttmynd sína Eg missti næstum vitið, sem er meginuppistaðan í sýningu Bjargeyjar í Listasafni Reykjavíkur, Hafnarhúsinu, sem opnuð var um síðustu helgi.

„Mér finnst líka fyndið að fólk skynjar söguþráðinn á mjög ólíkan hátt. Eg hef fengið að heyra svo margar útgáfur á því hvernig fólk skynjar þetta, og það finnst mér æðislegt.“



BJARGEY ÓLAFSDÓTTIR

Í dag verður Bjargey með listamannspjall í tengslum við sýninguna þar sem hún sýnir þrjár stuttmyndir sínar og ræðir við áheyrendur um gerð þeirra. Auk myndarinnar Eg missti næstum vitið verða sýndar myndirnar Falskar tennur og Jean.

Sýning Bjargeyjar í Hafnarhúsinu er innsetning með ljósmyndum, sem hún tók meðan á gerð myndarinnar stóð. Myndin er sýnd í sama herberginu og hún var tekin upp í.

Leikarar í Eg missti næstum vitið eru Kristján Franklín Magnús og Þrúður Vilhjálmsdóttir.

Bjargey heldur brátt utan til Berlínar þar sem henni var boðið að taka þátt í samstarfi ungra kvikmyndagerðarmanna í tengslum við kvikmyndahátíðina þar í borg. ■

## FJÖLLEIKAR



**FJÖLLEIKAHÚS Í LEIKHÚSINU**  
Tveggja manna sirkusinn Oki Haiku Dan sýnir í Borgarleikhúsinu.

## Tveggja manna sirkus

Sébastien Dault og Keisuke Kanai eru tveggja manna sirkusinn Oki Haiku Dan. Uppselt var á sýningu þeirra í Borgarleikhúsinu í gær og því var ákveðið að þeir héldu eina aukasýningu í dag.

Sýningu sína nefna þeir „Bougez pas bouger“, eða „Hreyfa ekki hreyfa“.

Þetta er einlæg sýning fyrir alla fjölskylduna þar sem fimleikjum, leikjum með hluti, látbragðsleik, leiklist og dansi er blandað saman á nýstárlegan og skemmtilegan hátt.

Annar kastar hlutum í loft upp og dansar, hinn dansar og flýgur. Á miðju sviðinu sveiflast svifróla. ■



Reykjavíkurborg



## Kynningarfundur

vegna breytinga á gatnamótum Kringlumýrarbrautar / Miklubrautar og Kringlumýrarbrautar/Listabrautar

Framkvæmdasvið Reykjavíkurborgar og Vegagerðin boða til kynningarfundar vegna breytinga á gatnamótum Kringlumýrarbrautar / Miklubrautar og Kringlumýrarbrautar / Listabrautar.

Kynningin fer fram fimmtudaginn 3. febrúar kl. 17:00 í Álftamýrarskóla

Kynntar verða úrbætur á gatnamótum Kringlumýrarbrautar/Miklubrautar sem fyrirhugaðar eru á þessu ári og matsáætlun fyrir mat á umhverfisáhrifum mismislaðra gatnamóta Kringlumýrarbrautar / Miklubrautar og Kringlumýrarbrautar / Listabrautar.

Fundurinn er boðaður í samvinnu við Hverfisráð Háaleitis en er öllum opin.